

Augsburg, 24. Mai 1571

An Hugo Blotius

ÖNB Wien, Cod. 9737^z, Kassette I (Nr. 14), fol. 47r.

S. Tardioris responsi mei ad literas tuas posteriores causa fuit absentia Io[annis] Ludouici Hauenreuteri, à quo hodie demum aliquid accepi: si tamen aliquid: ac non potius nihil. Significat enim, illic nullum vacare locum te dignum, meqüe hortatur, ut hic tibi prospiciam. Quod utinam aequè possem facere ac volo. Sentires profectò, vir clariss[ime], Wolfium tui amantiss[imum] et studiosissimum. Sed impedimur, proh dolor, et temporibus, et religionis dissidijs irreligiosis. Fuggeri non nisi pontificios admittunt. reliqui ciues, etiam locupletissimi, quaternos aut plures etiam vni paedagogo mandantes liberos, ultra 50 nostrates florinos ad summum vix ulli solent numerare. Quae conditiones quàm et praestantia tua deditiae sint, et non semper obuiae, cùm ipse intelligo, tum D. Hainzelius (Nam cum Langnauero nulla mihi est familiaritas) negat ullam esse spem commodis in hac vrbe tuis consulendi. Italiam quidem omnino vitandam esse tibi censemus. De Gallia bene speramus. Rex enim dicitur pacificationem omnino velle sartam tectam conseruare, sumentem suppicia de illius perturbatoribus. Belgium et Hispaniam apage: οὐκ ἀνδράσιν ὅρκεα πιστὰ ουδὲ λέουσι. Latissimè patet et Germania nostra et Gallia: in quibus, vbi et excellens ingenium tuum, et eruditio multiplex, et πολυγλωττία, et vsus rerum quo polles, et facundia, et morum dexteritas innotuerint (idqüe ut fiat, per amicos et notos omnes, praesertim aulicos, etiam atque etiam laborandum esse tibi censeo) non deerunt tibi honestissimi apud magnos principes receptus: qui talibus viris palatia sua et ornari et fulciri non sine causa existimant.

Praebeat interea nobis patientia portum:

Nostrae dum veniat mollior aura rati.

Hoc distichon annos abhinc 24 mei consolandi gratia scripsi: nec multò pòst opem diuinam sensi, cum tres mihi conditiones pro una, eodem tempore offerrentur: non illae quidem splendidae (Sunt enim mea omnia tenuia et humilia) sed quae me honestè possent alere. Sunt certae periodi et vires siderum:

Nec fera tempestas toto desaeuit in anno

Et tibi (crede Deo) tempora veris erunt.

Vale praestantiss[ime] D. Bloti, deque me persuasiss[imum] habeto, si quid in te conferre officij potuero, me accepisse beneficium existimaturum, qui digno dederim. D. Huttenum meo nomine salutes velim. Augustae Vindelicorum 24 Maij 1571.

Hieronymus Wolfius
Tuus.